

25/01/1999

PM rasmi Konvensyen Ketiga BN Sabah

KOTA KINABALU, Ahad - Perdana Menteri, Datuk Seri Dr Mahathir Mohamad, dijadual merasmikan Konvensyen Ketiga Barisan Nasional (BN) Sabah di sini pada 20 Februari ini.

Setiausaha BN Sabah, Datuk Karim Bujang, berkata konvensyen bertemakan 'Bersama membina masa depan' itu dijangka dihadiri lebih 3,000 pemimpin dan ahli akar-umbi sembilan parti komponen BN Sabah.

Katanya, matlamat utama konvensyen menjurus kepada persiapan menghadapi pilihan raya negeri akan datang.

Dr Mahathir yang juga Pengerusi BN Pusat dijadual melawat Sabah pada 18 hingga 20 Februari ini.

Ditemui pemberita pada rumah terbuka sempena Aidilfitri di kediamannya di sini hari ini, Karim yang juga Pembantu Menteri Kewangan berkata segala persiapan menganjurkan konvensyen itu sedang giat dijalankan.

Beliau berkata selain ucapan perasmian Perdana Menteri, satu kertas kerja akan dibentangkan oleh Setiausaha BN Pusat, Datuk Mohamed Rahmat.

Ditanya apakah konvensyen itu sebahagian persiapan menghadapi pilihan raya, Karim berkata: "Ia sebenarnya program tahunan BN Sabah bagi memantapkan perjuangan BN dengan memberi penekanan kepada pentingnya persefahaman di kalangan setiap parti."

Menurutnya, ia adalah satu usaha ke arah memantapkan kedudukan BN supaya terus kekal memerintah di negeri ini.

(END)